



A acción exterior nos programas electorais: PSdG-PSOE

Description



A *Fundación Galicia-Europa* parece que vai ser a principal ferramenta da Acción Exterior socialista. As súas competencias serían ampliadas e estendería as súas actuacións a (sic) Asia e Iberoamérica. Como volve aparecer a creación da *Delegación da Xunta de Galicia* en Bruxelas, haberá que supor que a *Fundación* pasará a ser algo distinto ou se poden dar graves duplicidades no futuro pero o programa non aclara máis. [Foto: Logo da *Fundación Galicia-Europa*].

Luchino Visconti tardou dous anos en rodar unha das súas grandes películas: O Gatopardo. Perfeccionista ata a desesperación, dise que esixiu que os luxosos armarios do palacio do Príncipe Salina estivesen cheos de roupa, aínda que permanecesen pechados durante as escenas. O espectador nunca o sabería pero os actores e técnicos sentirían que a viaxe á Sicilia do século XIX era máis *real*. Esa *verdade*, ese enbruxo, traspasaría a pantalla e, non se sabe moi ben como, chegaría aos espectadores.

Os programas electorais dos partidos son as sabas e a roupa de época que Visconti colocaba nas cómodas de *Donafugata*, o feudo do Príncipe Salina: case ninguén os coñece, poucos son os que os len pero sobre eles descansa a *credibilidade*, a *verdade* da candidatura. Sen os programas todo é máis falso, puro márketing político e, non se sabe moi ben como, os electores percíbeno. Nas próximas semanas imos analizar as alternativas máis importantes dos tres partidos para a acción exterior de Galicia. Empezamos polo PSdG.

A principal novidade da proposta socialista, comparada co programa de 2005, é un certo cambio de ton: a globalización no 2005 era fonte de oportunidades, o Tratado da Unión ou a Estratexia de Lisboa servían de incentivos e marcaban os obxectivos polos que había de traballar. No programa do 2009 nótase o peso da crise, a apatía pola que esta pasando a construción da UE e poida que a responsabilidade de goberno. O ton xeral é máis cauto, abundan as medidas contra a crise e desaparecen as referencias máis ambiciosas (v.g: *Galicia quere participar... no sistema de gobernanza global a favor da paz...* páxina 23, ano 2005).

A *Fundación Galicia-Europa* parece que vai ser a principal ferramenta da Acción Exterior socialista. As súas competencias serían ampliadas e estendería as súas actuacións a (sic) Asia e Iberoamérica. Como volve aparecer a creación da *Delegación da Xunta de Galicia* en Bruxelas, haberá que supor que a *Fundación* pasará a ser algo distinto ou se poden dar graves duplicidades no futuro pero o programa non aclara máis. Outro cambio importante é que desaparece o *Instituto Rosalía de Castro* proposto nas anteriores eleccións. A acción cultural que debería desenvolver o *Rosalía* pasa a ser substituída pola *colaboración co Instituto Cervantes*, ou polos centros galegos ou outro tipo de redes ou organismos.

Para os socialistas hai emigrantes ou “cidadáns galegos” que viven non exterior. Non utilizan o concepto Diáspora que, para moitos especialistas, reflicte mellor a realidade actual: os fillos ou netos dos “cidadáns no exterior” son arxentinos ou suecos, é difícil que se poidan cualificar de emigrantes ou exiliados. Para todos eles ofértanse propostas moi concretas: financiamento dos medicamentos aos emigrantes cando estean en Galicia, inscrición desde o seu país de residencia no Servizo Galego de Emprego, e outras moitas medidas asistenciais. Sobre a representación política hai un cambio fundamental: no 2005 propúñase a creación de circunscricións electorais para o exterior e, neste ano, faise fincapé nas garantías do voto. Tamén cambia o papel dos medios públicos de comunicación: a misión da difusión exterior e o contacto cos emigrantes trasládase ás “novas canles de difusión”, aínda que non se explicita claramente como será.

O programa socialista para o 2009 contén unha perla que abunda na tradición política hispánica de confundir os desexos coa realidade. Na páxina 20 pódese ler, como primeira medida a adoptar, que: “acadaremos non 2013 a plena converxencia en renda coa Unión Europea”. Tamén a Constitución de 1812 convertía aos españois en bos e benéficos pero, por desgraza, a mera enunciación dunha intención non a converte nalgo real a pesar do que parecen pensar moitos publicistas.

[Acceso ao artigo orixinal no repositorio web 1998-2012](#)

APARTADOSTEMATICOXEOGRAFICOS

Acción exterior de Galicia ARQUIVO

IDIOMA

Galego

Date Created

Febreiro 3, 2009

Meta Fields

Autoria : 10740

Datapublicacion : 2009-02-03 00:00:00